


7b
91-B
24356

E Hämpfeli Lieder

Von

Jacob Burekhardt

Faksimiledruck der Erstausgabe 1853




2. 5


0

21. 4. 4

Stämpfeli Sieder



☪ Hämpfeli Lieder.




G Hämpfeli Lieder.



Basel.

Schweighauser'sche Verlagsbuchhandlung.

1853.



Im Maie.

Leb wohl, du schönste Nacht vom Maie
Die je vergohet mit Wy und Gsang!
Mer grüesse dyni Sternereihe
Mit unfrem letschte Gläserklang;

Mer grüesse selbe Morgeschimmer,
Wo wyt sich uf der Schwarzwald leit,
Då Morgewind, wo uns ins Zimmer
Der Duft und 's Bluest vom Garte treit.

Und jek guet Nacht! es tönt in Alle
N-e reine Ton vo Glück und Kraft;
Sind's d'Lieder die noch wiederhalle?
Und tsch's der Wy wo Wunder schafft?

O nei, 's isch mehr! 's wird nit verwaihe
Mit Morgewind und Gläserklang! —
Leb wohl, du schönste Nacht vom Mate
Die je vergoht mit Wy und Gsang!

Im Kabinetli.

Do isch me=n=um der steine Tisch
Bis fast um achti gseffe;
Vom Dischcuriere händ sie d'Nacht
Und d'Rüehli ganz vergesse.

Du bisch mer gegenüber gsi
Und hesch nur glacht und gschwiege,
Und über Diner schöne Stirn
Isch grad e Stern ufgestiege.

I ha=n=e wohl dur's Reblaub gseh
Und ha=n=e glüsle höre:
„I bi der Stern vo Glück und Freud
„Und kenn die wo mer ghöre!

„Lueg her, du arme Bettelbueb,
„De bruuchsch nit länger z'sueche,
„De weisch, ob wehler Stirn' i stand,
„Jez gang und mach di zueche.“

Alles vergebeds.

S'ind alli Gasse still und s'Morgeliecht
Stygt hübschli über Muur und Dächer;
Der Brunne ruuscht; de trinksch noch, eb de gohsch,
E Gsundheit us dym Lederbecher.

Jeß selbe Fenster noch e Blick, sie sind
Mit grüne Jalousie bschlosse —
Und jeße renn! de wyhsch dym eigene Herz
Mit us, und füehrsch mit jeße Rosse.

Wohl schön isch's Birsthal, goldig glänze d'Flüeh
In herbstlig kühli Tiefe=n-yne;
Doch weisch, wer dir im Geist beegne wird
Uf Berge=n-und uf Burgruine?

Weisch, wem z'lieb, wenn de=n-ykehrsch um Mittag,
De bständig luege muesch uf d'Thüre?
Und uf em Heimweg, wehles Bild erschynt
Us alle=n-Obewulte füre?

Wohl müed kunnstsch wieder, aber ohni Rueh.
D flieh nur nimme! loß die Flamme
Nur ruehig brenne, wo dy armi Seel
Verzehrt! sie het e heilige Namme.

Ends October.

O liebe Herbst, bißch scho vorby,
Und alli Trübel gunne?
Wahrhaftig, d'Bäum sind halber bruun
Und goldgäl in der Sunne!

Von alle Matte ghört me Glüt,
'S find Mucheli, die sage:
„Gieb was noch hesch, du schönt Weib,
„By dene heitre Tage!“

Gehnd nur in Stall! — i weiß e Mensch
Dä ka zuem Winter lache,
Und sich e Frühjohr hoffetlig
Scho Ends October mache.

Hüt z'Obe gseh-n-i Di, my Schatz
Zmitz under gmuckte Lüte,
Bis daß me-n=endlich Spieler macht —
Weisch was das soll bidüte?

Und noch sitz i nebe Di,
Wenn sie der Punsch serviere!
Vom halbe Glas wirsch lustiger
Als leider ich vo viere!

E gheimi Underhandlig.

Cousine, Sie händ's gmerkt! ach goldeni Cousine,
Sie händ's am Frytig gmerkt, i gseh's an Ihrer Miene.
Nit wohr, Sie sage nyt? Es isch mer nit um mi . .
I bin us Pfersucht e rechte Dolbatsch gsi.

„Was gmerkt?“ — Sie wisse's wohl. — „E'isch guet
daß Sie's bikenne.
„E isch lycht z'entdecke gsi, wer gseh het, wie Sie brenne,
„Wil dä Losanner Herr emol Visite macht,
„D'Wikanntschaft vom Welschland — myn Gott, do gitt
me=n=Acht!“ —

I will mi zämmeneh. — „Und nimme muusche? nimme
„Vor jedem fremde Gesicht zündgüggelroth ergrimme?
„Sunst isch es glych am Tag.“ — Bis jeke=n=also nit?
Cousine, gend Sie mer dä Trost zuem Heimweg mit?

„I glaub, i weiß's allei. I ha mi bsunne sieder,
„I ha nyt für die Sach und ha=n=au nyt derwider.
„I schwyg, und wenn's mi au an alle=n=Gefte zupft!
„Denn vomme Gheimniß isch no nie fei Mensch verpupft.

„Und wie's eim isch — i ka mi an mi selber bsinne —
„Do lütet's Sturm im Herz; i glaub, 'S het noch grinne. —
„Jez, Vetter, froge Sie Ihr Gmüeth, das viel bigehrt,
„Sind Sie, wie Sie do stehend, der junge Thräne werth?“

Vn Diecht.

Do liege neu! Bücher uf em Tisch,
Und d'Lampe brennt — i soll e wenig lese,
Händ d'Tante gseit, i heig e gueti Stimm, —
Und gegenüber sitzt das liebste Wese!

Es strickt und strickt, ich aber lies und lies,
Und duffe schneit's; die beide Tante gähne,
Und schlofe=n=y, und wie=n=i übelueg,
So gseh=n=i in de schöne=n=Auge Thräne;

Nit vo der Gschicht, vo der i glese ha,
Es het e=n-andre Grund und tiefer lyt er.
Ganz still isch's gsi, nur's Tiktak vo der Uhr
Und 's klopfed Herz — bis daß Es seit: lies wyter!

I stackle wyter, — 'S het der Mueth nit gha
Mi rede z'losse, i bi folgsam bliebe.
Bald druf schloht's langsam achti, und das het
Die Tante gweckt, sie händ sich d'Auge griebe.

Am Wiehnachtsfraufastemärt.

Der neu Kalender! b'schau en mit Respekt!
Am Rand stehend d'Märt, und d'Gricht, und d'Landesvätter,
Und in der Mitti zwölsmol dryssig Tag
Und schwarzi Neumönd mit bikanntem Wetter.

Z'erst suech i jeß Dy Namme=n=uf! es goht
E goldene Schyn um selbe ganze Monet.
Derno, wenn föhnd im Summer d'Ferie=n=a?
I mueß es wisse, 's isch e gueti Gwohnet.

Sunst ha=n=i in de Wiehnachtsferie scho
D'Landkarte=n=agluegt für die Reis im Summer;
Die liebe Fründ studiere jeße dra, —
I kumm nit mit, und 's macht mer wenig Kummer.

Wo Du higohsch, das weiß i scho. Es lyt
E Hus im Baselbiet, im grüne Schatte;
Der Berg uf gseht me Stiegele=n=und e Hag
Und Tannewald, der Berg ab nyt as Matte;

Und dörthi nimmt Di d'Tante wieder mit,
Und's Thal isch heilig — darf i nochschlyde?
Bueg, nur e=n-einzige strenge Blick vo Dir,
So will i glych in alli Wälder wyche!

Sunst käm i gern an mengem Romittag
Und fűehrte Di ganz hübschli über d'Weide
Berguf, wo d'Tanne=n-in de Felse stehnd
Und d'Wasser sich zur Aar und Rhiwärts scheide,

Wo d'Alpe glänze wie=n-e Rosenkranz —
Dört wurd' i bettelt: ob De nit wellsch singe?
Mer sind allei, me ghört vo nooch und fern
Nyt as de Heerde=n-ihri Glocke klinge —

Ob nit wellsch singe? mit der ganze Stimm,
Die z'Basel unde halber muesch verstecke?
Es schloft meng Echo ruehig im Sibirg
Und ließ am liebste sich vo Dir erwecke

Wo bin i aber? ach, Dezember isch's,
Graufastemärt, und duff' e wahres Babel,
Und d'Buurebuebe laufe d'Gasse=n-i,
E jede=n-e Harmonica am Schnabel!

Uf der Gass.

Es isch spoti Nacht, und d'Läde zue --
Me ghört doch Gsang und Saite,
Und s'Schubert's Lieder kennt me-n-au,
Und s'Gritli mueß bigleite.

I kenn Dy Herz, wie's Dthem zieht,
Es wurd e mengi gryne.
Dir wird's scho nur vom Singe lycht
Und sunst verziehsch fei Miene.

Dä wo die Tön erfunde het
Ghört au scho zue de Stille,
I thät em sunst no Kräfte gern
G-n-Ghr um Dynetwille.

Die Lieder gehnd um d'Welt zringsum,
Schön find sie ohni z'wähle. —
Doch weiß i's erst vo Dir: Sie find
G Gsang für starki Seele!

Nyt Eiges meh

Was wie-n-e Flamme-n-uf mym Scheitel rueht,
Du bisch die Glueth!

Was wie-n-e helli Wulke-n-um mi waltt,
Du bisch die Gwalt!

Und s'Morgeroth schynt dur e Rosehag,
Du bisch der Tag!

Und d'Esterne glänze-n-in der hellste Pracht,
Und Du bisch d'Nacht!

Es ghört mer weder Denke, Gseh noch Thue
Meh eige zue, —

Wer het mi au mit Allem was i bi
Verschenkt an Di?

Deheime.

Wie isch mer jeh die grossi Stube z'eng,
Syt selbi Schmerze=n=yziehnd mit Gidräng!
Wie luege mi die Büecher wo=n-i ha
Wo dene Schäfte trurig a!

Kei Arbet ruckt, und eb i's merke will
Lyt wieder d'Stirn uf beide=n=Arme still.
Do gspür i wie mer's Bluet dur d'Schlöfe jagt,
Wie's inner Leid am Herze nagt.

I ka nit jomere, denn es schickt si nit,
Keim Andre bring i gern my Kummer mit.
Die lange=n=Doe, Herz, ergieb di dry,
Sie wend allei erduldet sy.

Die ersi Prob! — und wenn i's überstand,
So bin i erst recht werth der liebe Hand.
Und soll's nit sy, und trag i's ohni Ghül,
So zwing i in der Welt no viel.

Noch emol uf der Gass.

'S schloht halber Gfß. Nur e matte Schimmer
Dringt dur die bschloffne Jalousie dure.
Doch gseh=n=i, jeh nimmsch's Liecht und gohsch in d'Rueh,
Langsam verschwindet d'Helli, d'Stege=n=uf.
O nur das Händli möcht i seh das jeh
Dursichtig roseroth die Flamme schützt!
Willicht luegsch mit de große=n=Auge drüber
Gweg und förchtsch Di — denn es isch nit ghür.
My Geist stoht uf em Stegenabsatz vor Der
Und luegt Di a, der gueti, armi Geist.

Ned und Antwort.

Sag was isch uf der liebe Welt
Noch azfoh, Mensch, mit Dir?
De stuunsch in's Blau, wie d'Wulke ziehnd
Und bisch bald hinterfür.

„So loß mi stuune. Dent, i suech
„E Stern, wo d'Wulke deckt.
„Giduld nur, bis sie übrezieht
„Und 's Liecht mi wieder weckt.“

De thuesch nyt meh, De redsch nyt meh
Und stiehlsch em Herrgott d'Zyt.
„I red im Stille zue dem Stern
„Bis Antwort kunnt — 's isch wyt.“

Und Tag für Tag lauffsch ganz allei
Zuem Thor uus dur der Schnee.
„I suech die Stell, wo i dä Stern
„Zuem letschtemol ha gseh.

„De darffsch es wisse, 's stobt am Hag
„E große-n-Aepfelbaum.
„Dört wach i uf, was i mit euch
„Jez red und thue, isch Traum“.

Am Jenfersee.

Ganz einsam schlych i dur das Wunderland,
Es treit mi, wie me meint im Traume z'schwebe.
I glaub mengmol, i faß Dy kleini Hand —
Eisch au nur Traum, doch dâ isch jeh my Lebe.

Do hesch jo gwohnt! i gseh vo wytem s'Huus
Wo Dy Welschland muess gsi si, übrem Ufer,
Wie domols wachse d'Bäum noch drüber uus,
Und vorne glänzt der Garte still und sufer.

Die wyffe Segel uf em blaue See,
Die Ihr alls zellt händ, gseht me-n-all's noch schwimme;
In Guri Stube luegt mit ewigem Schnee
Der Montblanc hne, doch Di gseht er nimme.

Selbmol bisch gwies e liebe Wildfang gsi,
Wie d'jeze lieb bisch in Dym stille Trure,
Du Ferni! . . . Dir ghört Alles was i bi
Und unser Trennung ka nit ewig dure.

O Nebenufer! dir vertraut me doch
Dä Flor vo zarte sechzehnjährige Rose —
Erfreu sie mit dym volle Jubel noch,
Gb's Schicksal kunnt mit syne dunkle Loose!

Borgsicht.

Es gitt en Ahnung, und sie nimmt mengmol
E sichri Gtalt a und erschynt, me mag
Sie wölle=n=oder nit. I weiß dervo.

Emole=n=amme heisse Summertag
Do sim mer unser drei wyt über d'Berg
Und z'Obe=n=in der Dämmerung beim dur 's Debrli.
Do frueh vor Tag fast bständi uf de Beine,
Sind alli müed und händ scho halber gschlose
N=im Goh. — Do gseh=n=i, nit wyt vor em Brückli,
Drei Männer stoh, die uf is gwartet händ.
I bschau sie recht, und 's kunnt mer vor, sie gsähe
M'uns selber zglych. nur noch emol so alt,
Wie älttri Brüeder us 're=n=erste=n=Gh.

Der Gint von uns soht mit sym Gebild
A z'rede: Sag, was trybsch? — und 's Gebild,
E starke blühende Ma mit heitrem Aug,
Gitt Antwort: „Gschäft und Mueh Johr us Johr n,

„Und doch goht Alles guet; e lustig Huus,
„E liebi Frau und liebi gsundi Kinder.“


Dem Zweite von uns stoht sy Ebebild
Wie imme wyffe Mantel gegenüber,
Mit blassem Gesicht, und doch voll Ruch und Friede.
Und ungfrogt seit's: „Gsehstsch au das stilli Land
„Voll Morgeroth? Me goht mit lychtem Schritt,
„Ganz lys, es isch aß ob eim d'Blueme treite,
„Und alsfirt gege Sunnenaufgang hi.
„Wottsch wisse was i mit mer trag? nur 's Liebste,
„Die schönste Stunde=n=us der schöne Jugeb.“

Und endli kunnt's an mi. I ha nit gwogt
My Ebebild recht z'bschaue; wie=n=e Schleier
Isch's übreim gfi, doch ha=n=i d'Stimme erkennt
Und ghör sie noch: — „D glaub's, heig d'Mensche gern!
„'S isch 's einzig Glück! und was di jeh bigeistret,
„Sygs Liebi, Fründschaft, Heimeth, Poesie,
„Gib's nit lycht uf! S'ta mengs e Täuschung sy,
„Und ennemeg e gheime Sege druf!“

I ghör noch rede, doch sind alli Drei
Verschwunde. I verwach wie us em Traum

Und seh die beide Fründ scho vor mer ane;
Sie gehnd aß wenn nyt gsi wär, — wie-n=i afang
Wo dem was gscheh isch, luege sie mi a
Zerst wie nit gscheit und föhnd derno a z'lache:
„Es heig mer traamt.“ — Mira, so blyb's derby.





Das Verse machen ist doch mein letzter Trost, wenn alle Stränge reißen.“ So war es um Burckhardt, den Dichter, bis ins hohe Alter bestellt. Aber er wollte mit dieser Begabung nicht allzusehr hervortreten. Er gab daher nur zwei kleine Sammlungen in Druck und auch diese nur anonym: 1849 „Ferien. Eine Herbstgabe“ und zu Weihnachten 1853 „E Hämpfeli Lieder“. Diese Mundartgedichte — nicht eigentlich Baseldeutsch, sondern alemannisch im Hebelschen Sinne — ließ er überdies bald zurückziehen, da er fortan in der Geibschens Lyrik das Vorbild sah. Und doch sind gerade die „Lieder“ die persönlichsten und innigsten, die Burckhardt zu geben hatte. Sie sind, außer dem ersten und letzten, von dem damals Dreißigjährigen an die neunzehnjährige Margaretha St. gerichtet, das Gritli. „Im Maie“ war Burckhardts Geburtstag. „Vorsicht“ schildert ebenfalls


ein wirkliches Erlebnis.



Dieser Heimeran Neudruck bildet die Erstausgabe getreu nach. Nur auf dem Umschlag ist der Name Jacob

Burckhardt beigelegt und die Originalverlagsangabe (wie im Innentitel; heute Schwabe & Co.) weggelassen.





91-B24356



